

Trabaonan ta bayendo mas rapido cu a spera

Diahuebs ta basha fundeshi di e dish pa e Ground Station

ORANJESTAD(AAN) -- Diahuebs bashamento di e fundeshi ariba cual lo establece e dish pa e ground station lo tuma lugar.

Asina director interino di Setar Ing. Richardson a duna di conoce na DIARIO durante un entrevista.

Actualmente ta na Aruba un experto di e compania GTE, Jim Lynn, kende mester inspecciona pa despues aproba e fundeshi.

Hunto cu Ing. Richardson, DIARIO a bay na e edificio nobo bao construccion na Sero Blanco, caminda por a mira con leu construccion di e fundeshi ta. Por bisa cu practicamente tur cos ta cla pa bashamento.

Señor Jim Lynn, kende tabata



hunto cu e coordinador di e proyecto Ir. Jan Groen, a bisa cu e ta contento cu el a yega prome cu e bashamento tuma lugar pa asina por yuda den preparacion di e bashamento.

Jim Lynn tabata splica tanto Ir. Groen como Ing. Richardson e sistema mas apropiado pa pone e pianan ariba cual e dish lo bin para.

Ta trata aki di un dish di mas o menos 15 m, cual segun Ing. Richardson den e dianan aki lo sali for di Merca.

Ing. Richardson a splica con lo posiciona e dish y tambe a bisa cu mester a construi e fundeshi manera ta stipula ya cu segun e exigencianan e mester por contra un horcan.

Na momento di un horcan lo



Momento cu e experto di GTE Jim Lynn ta splica coordinador Ir. Jan Groen y Ing. Richardson con lo ta e manera mas mihor pa pasha e fundeshi cu e pianan pa pone e dish ariba. E fundeshi ta especialmente traha pa e dish por resisti e biento di horcan.

drumi e dish, esta cabez ariba pa asina evita cu biento lo por causa daño na dje. Pa loko ta trata e awa cu por bay den e dish, segun Ing. Richardson esaki lo no ta problema ya cu e dish tin buraco caminda e awa por core bay. E dish lo worde posiciona cu cara Norte Este.

Pa loko ta trata construccion di e dish, señor Mike Humprey di Universal Antannas Incorporated (UAI) lo ta encarga cu esaki y manera tur cos ta indica, muy pronto e lo ta na Aruba pa cuminsa cu instalacion di esaki.

Ing. Richardson a splica cu ademas di e dish aki, tin lugar pa establece dos mas ariba e tereno y tambe un chikito ariba e edificio.

Pa loko ta trata coordinacion di e proyecto, esaki ta bao di encargo di e team Ir. Jan Groen di Nepostel, Ing. R.Ras, Ing. M.Sint Jago, Msc.Tromp.

Ing. Richardson a muestra DIARIO con tur e plannan pa cu e futuro di Setar ta poni ariba schedule y e fecha cu tur esakinan mester termina.

Notable ta cu tanto construccion di e edificio como e dish ta bayendo mas rapido cu a worde calcula.